

A Xunta de Goberno desta Deputación Provincial na súa sesión ordinaria do día 16 de xuño de 2023, adoptou, entre outros, o seguinte acordo:

6.32755.- ADXUDICACIÓN DE RUTAS E PRAZAS DO PROGRAMA “EN RUTA COA DEPO 2023”. (Expte. 2022063049)

1º.- A Deputación de Pontevedra, a través do Servizo de Cohesión Social e Xuventude, ten entre os seus fins promover a xestión de políticas públicas para a cohesión social, con especial énfase en persoas con discapacidade, persoas maiores e a mocidade.

Nesta liña, o programa “En ruta coa Depo” configúrase como unha acción encamiñada a fomentar a participación, a convivencia e a cohesión social dos distintos colectivos sociais da provincia de Pontevedra ao impulsar a igualdade de oportunidades para os colectivos con discapacidade, ofrecerlle alternativas de ocio e tempo de lecer á poboación xuvenil da nosa provincia e promover rutas destinadas ás entidades de nais e pais que fomenten a convivencia e o intercambio de experiencias nas que participen activamente nenas e nenos.

“En ruta coa Depo”, programa cun grande arraigo na provincia desde hai máis de dez anos, promove cada ano que preto de 20.000 persoas participen en rutas turísticas de lugares emblemáticos de Pontevedra; así, a través de asociacións sen ánimo de lucro da provincia, promociónase e dáse a coñecer o patrimonio natural, artístico, etnográfico e cultural de proximidade.

Trátase, polo tanto, dun programa cun claro obxectivo social que inclúe rutas específicas adaptadas a persoas con mobilidade reducida, a familias e á mocidade. Así mesmo, resérvanse prazas gratuítas para persoas en situación de risco ou exclusión social.

2º.- Desde o punto de vista competencial, no artigo 2 da Lei 13/2008, de 3 de decembro, de servizos sociais de Galicia, defínense os servizos sociais como un conxunto coordinado de prestacións, programas e equipamentos destinados a garantir a igualdade de oportunidades no acceso á calidade de vida e á participación social de toda a poboación galega mediante intervencións que permitan acadar os obxectivos marcados nesta lei. Así mesmo, no artigo 63, relativo ás competencias das deputacións provinciais, establécese que, de conformidade co previsto na normativa de réxime local, estas proporcionaranlles asistencia económica, técnica e xurídica aos concellos na execución das súas competencias en materia de servizos sociais.

Segundo o artigo 36.1.d) da Lei 7/1985, de 2 de abril, reguladora das bases de réxime local, é competencia propia da Deputación a cooperación no fomento do desenvolvemento económico e social e na planificación no territorio provincial, de acordo coas competencias das demais administracións públicas neste ámbito. Así mesmo, no artigo 109. d) da Lei 5/1997, de 22 de xullo, de administración local de Galicia, establécese que serán competencias propias das deputacións provinciais as que baixo este concepto lles atribúan as leis e, en calquera caso, entre outras, o fomento e a administración dos intereses peculiares da provincia.

3º.- A Xunta de Goberno, na súa sesión ordinaria que tivo lugar o día 9 de decembro de 2022 acordou, entre outros asuntos, á aprobación das Bases Reguladoras do programa “En Ruta coa Depo” para o ano 2023. As Bases reguladoras foron publicadas no Boletín Oficial da Provincia de Pontevedra (BOPPO) número 25, do 6 de febreiro de 2023.

De conformidade có establecido na Base Cuarta e Quinta, “(...)Poderán participar neste programa todas as sen ánimo de lucro que teñan o seu domicilio fiscal, sede ou establecemento aberto na provincia de Pontevedra, pero non as entidades de iniciativa pública. Así mesmo, non serán beneficiarias aquelas entidades incursas nalgún dos supostos previstos no artigo 13 da LXS. (...)”

Só se concederá unha ruta por entidade e NIF. O número máximo de participantes será de 54 persoas (a capacidade dun autobús), Para os colectivos de persoas con mobilidade reducida que precisen de cadeiras de rodas ou doutras axudas técnicas, as prazas por autobús serán, con carácter xeral, 34.

4º.- A Base Oitava establece que “(...)para tramitar este procedemento consultaranse automáticamente os datos incluídos nos seguintes documentos:

- NIF da entidade solicitante
- NIF da persoa representante da entidade solicitante
- Certificación de estar ao corrente das obrigas tributarias coa Axencia Estatal Tributaria, coa Facenda autonómica, coa Seguridade Social e coa Deputación de Pontevedra.

No caso de que as persoas interesadas se opoñan ás devanditas consultas, deberán indicalo no cadro habilitado no formulario de inicio e aportar os documentos correspondentes. Excepcionalmente, se algunha circunstancia imposibilitase a obtención destes datos, poderase solicitar ás persoas interesadas a presentación dos documentos correspondentes(...)”.

5º.- A Base Sexta establece que as entidades deberán achegar o “(...) certificado acreditativo do cargo da persoa representante da entidade (...)” e a “(...) relación de persoas solicitantes de prazas gratuítas (anexo III), de ser o caso (...)”.

6º.- Ofértanse 33 rutas e un total de 20.000 prazas, que segundo se establece na Base Novena que “se outorgarán segundo esta orde de prelación:

- 1) Entidades inscritas no Rexistro Único de Entidades Prestadoras de Servizos Sociais (RUEPSS) na categoría de iniciativa social nas áreas de discapacidade, familia, infancia e menores.
- 2) Entidades inscritas no RUEPSS na categoría de iniciativa social nas áreas restantes
- 3) Outras entidades sen ánimo de lucro

A prelación dentro de cada grupo de entidades será por orde de rexistro de entrada das solicitudes.

7º.- Consonte a Base Segunda a “contía consignada para este programe é de catrocentos setenta e nove mil catrocentos cincuenta (479.450,00) euros, con cargo á aplicación orzamentaria 23/231.2311.227.07 do Orzamento provincial, para un total de 20.000 prazas (...)”; o programa será cofinanciado pola Deputación do seguinte xeito:

- As persoas beneficiarias do programa aboarán a cantidade de 13,50 € por praza concedida, coa excepción das prazas de asignación gratuíta, que serán financiadas integramente pola Deputación

- *O importe das prazas para participantes menores de 12 anos poderá ser inferior en función da oferta presentada pola adxudicataria do programa.*
- *Reservaranse un total de 300 prazas gratuítas para persoas que carezan de recursos económicos suficientes ou que se atopen en risco de exclusión, segundo o previsto na base sexta, e a Deputación asumirá a totalidade do seu custo.*

Respecto da gratuidade de prazas, para poder beneficiarse destas prazas, a entidade deberá acompañar coa solicitude unha relación de persoas que participarán na saída (anexo III) e indicar o número das que, por carecer de recursos económicos suficientes, non podan facerse cargo da aportación de 13.50 € que lles corresponde (o u unha cantidade inferior, no caso de menores de 12 anos se a empresa adxudicataria ofertase un prezo máis baixo), e xustificar que estas persoas se encontran nas seguintes circunstancias:

- Estar en situación ou risco de exclusión social.
- Contar con escasos recursos económicos e presentar un informe social onde se indique a idoneidade do programa para a persoa solicitante.

Esta xustificación realizarase, una vez adxudicada a ruta, mediante un informe dunha traballadora ou traballador social dos servizos sociais comunitarios municipais (anexo IV) ou da propia entidade solicitante (anexo V).

No caso de que existan máis solicitudes que prazas, terase en conta a orde de presentación da solicitude de cada entidade. Este informe presentarase, dirixido ao Servizo de Cohesión Social e Xuventude, conforme á base sexta, no prazo de dez (10) días hábiles, contados a partir do día seguinte ao da notificación de adxudicación das rutas e prazas gratuítas que lle corresponden a cada entidade.

8º.- Unha vez rematado o prazo de presentación de solicitudes e de subsanación das mesmas, de acordo coas bases reguladoras deste programa, o resultado é o seguinte:

- Constan no expediente un total de 430 solicitudes presentadas, das cales:
  - o 408 cumpren os requisitos establecidos na convocatoria
  - o 22 resultan excluídas, das cales:
    - 14 solicitudes por non enmendar en prazo.
    - 1 por renuncia.
    - 1 por non ser beneficiaria do programa.
    - 1 por non presentar modelo normalizado.
    - 2 duplicadas.
    - 3 por ser persoas físicas, unha delas tamén duplicada
    -

Unha vez aplicada a orde de prelación establecida na base novena da convocatoria, relativa a “*criterios de valoración*”, o resultado é o seguinte:

As 408 solicitudes aceptadas supoñen un total de 21.812 prazas das cales 469 solicítanse como gratuítas.

Unha vez aplicados os criterios de prelación, adxudícase Ruta a 374 entidades que totalizan 19.976 prazas, das cales 405 son gratuítas. Como o máximo de prazas gratuítas que se ofertan no programa son 300, seguindo os criterios de prelación previstos na convocatoria, adxudícanse 270 prazas gratuítas, quedando 135 prazas en lista de espera.

Así mesmo, 34 entidades quedan en lista de espera (1.836 prazas e 64 gratuítas).

Unha vez notificado o Acordo de adxudicación a cada unha das entidades beneficiarias, estas deberán achegar no modelo Anexo V as valoracións sociais das persoas en risco de exclusión social que participarán nas saídas.

Coa relación definitiva o número de prazas gratuítas podería variar, manténdose en todo caso o máximo de 300 prazas financiadas por esta Institución.

9º. Por Acordo da Xunta de Goberno número 21.32399 de data 10 de marzo de 2023, adxudicouse o procedemento aberto convocado para a contratación do Servizo de Xestión, desenvolvemento e execución do programa “*En ruta cos depo*” 2023. Expte 2022062867, á empresa “*Halcon Viajes S.A.*”, sendo o prezo unitario ofertado por praza o seguinte:

- Importe sen IVE: 26,03 €
- IVE: 5,47 €
- Importe total ofertado: 31,50 €

Así mesmo, ofertan a gratuidade de prazas para nenas e nenos menores de 12 anos. No obstante, aínda que algunha entidade indica na súa solicitude o número de nenas ou nenos menores de 12 anos, o dato é unha previsión inicial, que xeralmente varía moito unha vez se desenrole o programa, polo que para o cálculo do importe a financiar por esta Institución non se terán en conta, e computarán como prazas ordinarias.

10º. Consonte ao anterior e ao abeiro do establecido nas Bases Reguladoras do programa, procede á adxudicación de rutas a 374 entidades o que suporá un total de 19.976 prazas ordinarias e ata un máximo de 300 prazas gratuítas, das que a Deputación de Pontevedra financiará os seguintes importes:

PREZO UD. GRATUITAS	N.º PRAZAS	CUSTO USUARIO	FINANCIACION DEPUTACIÓN	SUBTOTAL
31,50 €	Máx. 300	0,00 €	31,50 €	9.450,00 €
PREZO UD. ORDINARIAS	N.º PRAZAS	CUSTO USUARIO	FINANCIACION DEPUTACIÓN	SUBTOTAL
31,50 €	19.676	13,50 €	18,00 €	354.168,00 €
TOTAL GLOBAL				363.618,00 €

11º. Con data 12 de xuño de 2023, Intervención emite informe favorable ao expediente de adxudicación de 19.976 prazas a 408 entidades por un importe de 363.618,00 €

**NORMATIVA APLICABLE:**

- Lei 7/1985, de 2 de abril, reguladora das bases do réxime local
- Real decreto legislativo 2/2004, de 5 de marzo, polo que se aproba o Texto refundido da Lei reguladora das facendas locais
- Lei 39/2015, de 1 de outubro, do procedemento administrativo común.
- Lei 13/2008, de 3 de decembro, de servizos sociais de Galicia.
- Bases de execución do vixente Orzamento provincial para o ano 2023.
- Bases do programa En Ruta coa Depo 2023.

De acordo co exposto, a Xunta de Goberno acorda por unanimidade:

Primeiro - Aprobar a adxudicación de 19.976 prazas a 374 entidades da provincia de Pontevedra, das cales ata un máximo de 300 serán gratuítas, no marco do programa En ruta coa Depo 2023, atendendo aos criterios de prelación establecidos nas bases reguladoras.

Segundo.- Aprobar a relación de entidades excluídas, entidades en lista de espera, e adxudicación de prazas gratuítas.

Achéganse có presente informe os seguintes documentos que obran asinados no expediente cós seguintes CSV:

- Anexo I : Listado das entidades solicitantes aceptadas CSV: N5UJ5KKH3UJBG5N3
- Anexo II: Listado de entidades excluídas CSV: NNJV9KACATWYWLCI
- Anexo III: Listado das entidades con ruta asignada CSV: NT4NM9VBDT1623XB
- Anexo IV: Listado das entidades en lista de espera CSV: RUMDQZJ8ND8JE1WV
- Anexo V: Listado de prazas gratuítas das rutas adxudicadas CSV: HKNTM2MP1GZ0AZ8A
- Anexo VI: Listado de prazas gratuítas en espera das rutas adxudicadas CSV: HQ8LZQ7N4G38FGT3

O que lle comunico a Vde. para o seu coñecemento e efectos, coa salvidade que establece o art. 206 do RD 2568/86, de 28 de novembro.

*Asinado dixitalmente na data que figura á marxe.*

Contra este acordo que pon fin á vía administrativa poderá interpoñer recurso potestativo de reposición perante o mesmo órgano que o ditou, no prazo de un mes a partir do día seguinte ó desta notificación (*artigos 112 e 124 da Lei 39/2015, de 1 de outubro, de Procedemento Administrativo Común das Administracións Públicas*), ou ben, directamente recurso contencioso-administrativo perante o Xulgado do Contencioso-Administrativo de Pontevedra segundo o disposto no artigo 8 da Lei 29/1998, de 13 de xullo, Reguladora da Xurisdición Contencioso-Administrativa, e todo iso no prazo establecido no artigo 46 da citada Lei.

Todo iso sen prexuízo de que poida utilizar calquera outro recurso que estime conveniente.